

# La Corporaziun academica Rezia a Friburg è sistida

■ (anr/gc) **La Rezia veterana – ella cumpiglia anteriurs ed anteriuras da la Corporaziun academica (CA) Rezia a Friburg – è vegnida confruntada venderdi passà tar la radunanza annuala a Cuira cun il fitg trist fatg che la Rezia a Friburg è vegnida sistida a la fin da 2016.** Mancanza da commembers, la numpussavladad da pudair recrutar novs e suenter che plirs dals paucs bandunan en curt il lieu da studi Friburg han effectuà questa fin.

La CA Rezia è vegnida fundada 1957 sco emprima e suletta secziun rumantscha en la Societad da students svizzers (SSS – Schweizerischer Studentenverein/ StV). La Rezia veterana ha deplorà grondamain la sistida da sia Activitas. Ella vegn dentant a cuntinuar – era senza ina secziun activa – en l'uniun dals anteriurs da la SSS e festivescha quest atun a Friburg il 60. anniversari dapi la fundaziun da la Rezia.

## Revista e prevista

Sut il presidi da *Barbla Etter* è la Rezia veterana sa regardada dal commember defunct Carli Gnädinger (1934–2016), stà confundatur da la CA Rezia ed autur da quest memorandum che ha giustifitgà il dretg d'existenza da la Rezia ch'è sin quai

vegnida recepida 1961 definitivamain en la SSS. Era 2016 ha la Rezia organisà l'avust il tradiziunal pelegrinadi per l'entira SSS si Ziteil cun avat *Vigeli Monn* sco celebrant principal. Numerus han prendì part, schizunt da la Germania ed Austria, davent da Muntér si vers Ziteil. Entgins èn schizunt pelegrinads davent da Casti sur Muntér si Ziteil. Era quest onn ha il pelegrinadi lieu l'avust.

Plirs commembers han prendì part 2016 a Sviz da la festa centrala per 175 onns SSS. Per quest anniversari datti ina publicaziun speziala che resguarda era la Rumantschia en la SSS. Quest onn ha la festa centrala lieu a Rheinfelden.

Per la terza giada ha la bainfrequentada canorta da la Rezia per la fin da l'onn gè lieu a Cuira. – Il quint serra cun in pulit avanzament ed ina considerabla facultad. La Rezia veterana ha 110 commembers. Quest onn è vegnì vitiers in nov.

## Viseta al Museum retic

Entschavì ha l'inscunter cun visitar en il Museum retic l'exposiziun «Calling Jenatsch» sut la guida da la collavuratura scientifica *Silvia Conzett*. Ida a finir è la radunanza annuala da la Rezia veterana cun ina tschaina e da cumpagnia en l'hotel Marsöl.